




ԸՆԴՈՒՆԵԼՈՒԹՅՈՒՆՆԵՐ ՄԱՅՐ ԱԹՈՌՈՒՄ

**Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ
ԸՆԴՈՒՆԵՑ «ՀԱԶԱՐԱՄՅԱԿԻ ՄԱՐՏԱՀՐԱՎԵՐՆԵՐ» ԾՐԱԳՐԻ
ԳԼԽԱՎՈՐ ԳՈՐԾԱԴԻՐ ՏՆՕՐԵՆԻՆ**

Հունիսի 12-ին Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց «Հազարամյակի մարտահրավերներ» ընկերության գլխավոր գործադիր տնօրեն դեսպան Ջոն Դանիլովիչի գլխավորած պատվիրակությանը:

«Մենք ուրախ ենք, որ «Հազարամյակի մարտահրավերներ» ծրագրի շրջանակներում նման օգնություն է ցուցաբերվում Հայաստանի տնտեսությանը: Իրապես, մեծ է այն օգնությունը, որ այսօր մատուցվում է մեր ժողովրդին», - նշեց Նորին Սրբությունը՝ ողջունելով դեսպան Ջոն Դանիլովիչի այցը Մայր Աթոռ Սուրբ Էջմիածին և իր գոհունակությունն ու գնահատանքը հայտնելով «Հազարամյակի մարտահրավերներ» ընկերության գործունեության համար:

Վեհափառ Հայրապետը հյուրերին ներկայացրեց նաև Հայաստանյայց Եկեղեցու առաքելությունը, համայն հայության հոգևոր կենտրոն Մայր Աթոռ Սուրբ Էջմիածնի հիմնադրման պատմությունը, անդրադարձավ Եկեղեցու առջև ծառացած մարտահրավերներին և դժվարություններին, այժմյան գործունեությանը:

«Հազարամյակի մարտահրավերներ» կազմակերպության գլխավոր գործադիր տնօրենը իր հերթին, շնորհակալություն հայտնելով ընդունելության համար, Վեհափառ Հայրապետին ներկայացրեց Հայաստան այցի մանրամասները և ուրախություն հայտնեց այս ժամանակահատվածում կատարված աշխատանքների համար: «Վստահ ենք, որ այս ծրագիրը մեծ օգտակարություն կունենա Հայաստանի բնակչության համար», - ասաց պրն Դանիլովիչը: